

Ekalesia Faapotopotoga Kerisiano i Amerika Samoa

AU LEOLEO 2019



la Tatalo ma Mataala

UPU TOMUA

Taoto ia faamaene o tai loloto le paia sauoo o le Ekalesia, ua uma ona tosi lauti ona mamanu faatiti o tausala, e le gafataulimaina e se leo faatauva'a o le auauna.

Ae avea ia lenei laolao ou te fai ma sui o le Mafutaga Au Leoleo matou te faatalofa atu ai i le mamalu o le au fai tatalo a o tatou aga atu i galuega amata o lenei tausaga ma la tatou folauga. Talofa Lava! Malo Folau! Faafetai Tatalo!

E iloa sa o tupu o Samoa i siutila ma ulula; e faapena le Kerisiano e fiafia e mafuta i le Atua i le tatalo. E toafilemu ma e tumu i meaalofa mai le Atua.

Na taina e A. T. Peterson le mea aupito taua i le agai i luma ma le tuputupu o le galuega tala'i a le Ekalesia e faapea:

O laasaga uma i le aga i luma o le galuega tala'i; e tala lava lona amataga i le tatalo. O le tatalo o se tapenaga lea mo soo se manumalo fou, ma o le mea lilo lena i faamanuiaga uma.

O le mea lea, ia tatou faamalolosi ma tutumau i le tatalo e le aunoa. Tatala lou finagalo i le faaali mai o le Atua e ala i ana afioga e faavae ai a tatou tatalo.

Ia manatua, o le tatalo o se auupega taua tele, ma e mafai e tagata uma ona faatino. O le susuga i le toeaina ia Setefano Young o le Matagaluega a Kalefonia i Saute ma le afaigaluega na saunia lenei taiala e fesoasoani atu ai i la tatou Ekalesia fai tatalo, malo lava le tapena.

Ia manatua o tatou o leoleo o le aiga ma le fanau a le Atua i soo se itu o le lalolagi e ala ia tatou tatalo ma talosaga.

Tautalatasi Fanolua FT
Peresetene
Mafutaga Au Leoleo, 2019

TAUTINOGA MAFUTAGA AU LEOLEO

Ou te ta'utino atu, o le Mafutaga a le Au Leoleo, o le mafutaga tatalo a le Ekalesia, e galueaina ai le ola faaleagaga o le 'au faatuatua i le Atua.

Ou te ta'utino atu foi, o le Atua o le Agaga lava ia, e su'eina o tatou agaga ma fuatia o tatou loto.

O le mea lea ou te ta'utino atu, o le a ou su'esu'e ifo i lo'u ola, ma ou toaga i mafutaga tatalo ma tapuaiga, atoa ma mea fai uma a le Ekalesia. Ina ia ou le tama/teine pea i le faatuatua, a ia oo i le ua matua i le agaga.

Ou te ta'utino atu o le a fai ma a'u tatalo tauave:

Le Alii e, ia e alofa mai ia te a'u le tagata agasala. Ia e foai mai le loto tele e suia ai mea ua tatau ona sui, ma le to'afilemu e talia ai mea e lē tatau ona suia, ma foa'i mai le atamai e iloa ai le eseese o ia mea. Ia oo mai lou malo, ma ia faia lou finagalo i le lalolagi e pei ona faia i le lagi. Amene!

IANUARI

Ianuari 5, 2019

Tusi Faitau: Salamo 107 : 23 – 32

Matua: Salamo 107 : 29 “ua liua e ia le le afā i le malū, ua taoto ia te ia le au peau.”

Manatu Autu: O LE ALOFA MA LE AGALELEI O LE ATUA

Tatou Faafetai i le Atua :--

1. Ona o lona limataitaiina mai o la tatou faigamalaga i lona tausaga i lona alofa ma lona agalelei.
2. Ona o lona alofa tausii mai sa tatou molimauina pea i taimi uma o la tatou folauga.
3. Ona e ui ina tele fita ma faafitauli sa tatou fetaiiai aemaise o faalavelave ma puapuaga, a ua liua e ia ma malū.

Tatou Faatoese i le Atua:--

1. Ona o lo tatou le tausii ma faaaoga lelei le tele o ana meaalofa e ala i lana foafoaga.
2. Ona o lo tatou faatamala i taleni ma agavaa na ia foa'i mai mo lo tatou manuia ma tautua ai isi tagata.
3. Ona o le le mausali o lo tatou faatuatua e mafua ai ona popole ma atuatuvaile pe a fesoasoani i la tatou folauga.

Tatou Tatalo i le Atua :--

1. Ina ia a'oa'o mai pea ia i tatou; o a faigata tatou te fetaiiai i le ala, e lava lona alofa tunoa e fesoasoani ia i tatou.
2. Ina ia tatou mautinoa; o a puapuaga, o matagi ma afa e osofia a tatou faigamalaga e liua e ia ma taoto ia te ia le au peau.
3. Ina ia faatupuina pea lo tatou faatuatua; o le maliu ma le toe tu manumalo o Keriso, ua liua ai e ia le oti e fai ma taeao o le olioli.

Ianuari 12, 2019

Tusi Faitau: Ioane 1 : 1 – 18;

Matua: Ioane 1 : 6 – 7 “Na auina mai le tagata mai le Atua, o Ioane lona igoa. Na sau o ia o le molimau, ina ia molimau i le malamalama, ina ia faatuatua i ai o tagata uma lava ia te ia.”

Manatu Autu: IA FAI MA MOLIMAU IA IESU.

Tatou Faafetai i le Atua:--

1. Ona o lona faaaogaina o tatou tagata le atoatoa e molimau ia Iesu Keriso.

2. Ona o taleni o le poto ma agavaa ua mafai ai ona faatino la tatou molimau.
3. Ona o le Agaga Paia ua faamalosia ai la tatou molimau i soo se tafa ma soo se taimi, ma soo se tau.

Tatou Faatoese i le Atua:--

1. Ona o le faigata ona tatou maua le loto maualalo e talia ai lana valaau, e molimau i lona finagalo i le lalolagi.
2. Ona o le le faamaoni o la tatou molimau ua tuuina atu ona o le paie ma le augata.
3. Ona ua le moni le ofoina atu o lo tatou soifua ma le ola e molimau ai i lona alofa ma lona faamaoni.

Tatou Tatalo i le Atua:--

1. Ina ia moni ma faamaoni le ofoina o tatou ola e molimau i lona alofa, ina ia maua nisi mo lona malo.
2. Ina ia faaolaolaina pea la tatou molimau e ala i taleni, le malosi, ma agava ua ia foaiina mai.
3. Ina ia faamalosia e lona mana la tatou molimau ia Iesu Keriso le Alii ma le Faola seia oo lava i le faavavau.

Ianuari 19, 2019

Tusi Faitau: 2 Timoteo 3 : 10 – 17;

Matua: 2 Timoteo 3 : 16 “O Tusi Paia uma lava e mai le Agaga o le Atua, e aoga foi ia e a’oa’o ai, e faatonu ai, e faapoto ai foi i le amiotonu.”

Manatu Autu: O AFIOGA A LE ATUA.

Tatou Faafetai i le Atua:--

1. Ona o lana Tusi Paia ua fai ma sulu i o tatou laasaga uma, ma ua faallia ai le silisili ese ma le aoao o le pule a le Atua.
2. Ona o lana Tusi Paia ua faaalina mai ai lona finagalo ma lana amiotonu aemaise o lona alofa ma lona faamaoni.
3. Ona ua mafai ona faaali tino mai ai o Iesu Keriso o le taunuuga ma le atoaga o foafoaga uma a le Atua, o lē na malii ma toe tu manumalo ina ia faaolaina le lalolagi.

Tatou Faatoese i le Atua:--

1. Ona ua latou le fiafia e faitau i lana Tusi Paia i aso uma.
2. Ona ua tatou iloa ma malamalama i ana afioga e pei ona faaalina mai i le Tusi Paia a ua latou le ola ai i le tele o taimi.
3. Ona o le mama o tatou manatu i le taua o le Tusi Paia.

Tatou Tatalo i le Atua:--

1. Ina ia faatupuina lo tatou fiafia e faitau ma suesue i lana Tusi Paia.
2. Ina ia a'oa'oina tatou i le taua o le Tusi Paia e le gata e maua ai le poto moni, ae e faafouina ai lo tatou malosi faaleagaga.
3. Ina ia faamanatu mai pea ia i tatou; o le Tusi Paia e mai le Agaga o le Atua ia, e aoa'i, e a'oa'o ma faatonu ai o tatou ala ma manino ai ia i tatou lona alofa ma lana amiotonu.

Ianuari 26, 2019

Tusi Faitau: Mika 6 : 1 - 8;

Matua: Mika 6 : 8 "Sole, ua faaali atu e ia ia te oe le mea lelei; se a foi se mea e finagalo ai le Alii ia te oe, pe a le o ia mea, ia fai le amiotonu, ia naunau i le alofa, ma ia feoai ma lou Atua ma le loto faamaulalo?"

Manatu Autu: IA ILOA LE FINAGALO O LE ATUA.

Tatou Faafetai i le Atua:--

1. Ona o lona manatu alofa mai i le tagata e ala i le tele o meaalofa ma mea lelei ua faia mo ia.
2. Ona o loo tuu avanoa mai pea i le tagata, e ui lava i le tele o faamanuiaga ua faaali mai a o loo i ai pea le avanoa e filifili ai.
3. Ona o lesu Keriso o le tumutumuga lea o mea lelei na faia mo le tagata.

Tatou Faatoese i le Atua:--

1. Ona ua pogisa pea la tatou vaai i le tele o mea lelei ua faia e le Atua.
2. Ona o le faigata ona faamalamalamaina o tatou loto i le uiga moni o lona finagalo mo tatou.
3. Ona ua tatou teena pea lona finagalo alofa i mea e ao ona tatou faia ona o le agasala.

Tatou Tatalo i le Atua:--

1. Ina ia manino ia i tatou lona finagalo moni ma tali atu loa i ai e faia ma ola ai.
2. Ina ia naunau o tatou loto i le alofa ma ia feoai ma ia faia pe lana amiotonu i aso uma lava e le aunoa.

3. Ina ia a'oa'o mai pea i o tatou loto e le mana o lona Agaga ina ia faia lona finagalo i le lalolagi e pei ona faia i le lagi.

FEPUARI

Fepuari 2, 2019

Tusi Faitau: Kenese 1: 1 - 5;

Matua: Kenese 1: 1 "Na faia e le Atua le lagi ma le lalolagi i le amataga."

Manatu Autu: O LE ATUA FOAFOA

Tatou Faafetai i le Atua:--

1. Ona o lona mataisau na faia ai le lagi ma le lalolagi i le amataga ma ua lelei.
2. Ona o le saunia lelei o mea mo le manuia o le tagata le palealii o ana foafoaga.
3. Ona o lona faatumauiina o mea uma na ia faia e pei ona tatou molimauina i le siosiomaga.

Tatou Faatoese i le Atua:--

1. Ona ua tatou faaleagaina ana foafoaga paia ona o le manao tele ma le tuinanau.
2. Ona o lo tatou paie e galueaina ma tausia lelei le foafoaga a le Atua e pei ona tuuina ai tatou.
3. Ona o le manao tele o le tagata i le oa ma le tamaoaiga ia maua, ua tauaso ai le vaai i le faaleagaina o le foafoaga, ua le gata i le gataifale ae faapena foi le laueleele ma le ea.

Tatou Tatalo i le Atua:--

1. Ina ia a'oa'oina o tatou loto ma mafaufau i le matagofie o le foafoaga. Ia tatou taumafai ai e leoleo ma tausii ina ia faatumauiina lea matagofie.
2. Ina ia manatua pea o le Atua o le mataisau o mea uma; e leai foi se mea ua faia e le'i faia e ia.
3. Ina ia aveesea le ola soona fai, le faaleaga mea, a ia atinaeina le loto faamaopoopo ma le tausii lelei o fofoaga a le Atua. Ina ia manuia pea fanau a le Atua i le lumana'i.

Fepuari 9, 2019

Tusi Faitau: Esoto 5: 1 - 4;

Matua: Esoto 5: 3 “Ona la fai atu lea, na fetai ai ma i maua le Atua o sa Eperū; se’i e tuu mai, matou te o malaga i ni aso e tolu i le vao, matou te fai ai taulaga i le Alii lo matou Atua, ne’i taia mai i matou e ia i le faama’i po o le pelu.”

Manatu Autu: O LE ALII E AO ONA TAPUAIA

Tatou Faafetai i le Atua:--

1. Ona o ia o le Atua Tolu Tasi Paia, le Tamā, le Alo ma le Agaga Sa, e ao ona viia ma faamanuina mai le mea e oso ae ai le la seia oo i le mea e goto ifo ai.
2. Ona o lona manatu alofa i ona tagata ua asiasi mai ai, ma laveai ma faasaoloto mai le agasala ma soo se mea na saisaitia ai.
3. Ona o lona faamanatu mai pea i le tagata o ia o le Atua e toatasi e ao ona tapuaia e soo se mea e iai le ola ma le manava.

Tatou Faatoese i le Atua:--

1. Ona ua le mafai ona tatou viia lona suafa e pei ona tatau ai ona o le paie ma le valea.
2. Ona ua tatou le usiusitai e tusa ma lona finagalo faaali mai mo le saogalemu o ona tagata ona o le fia pule.
3. Ona ua pogisa la tatou vaai i le Atua, e aoa lana pule i mea uma e oo lava i le tagata ma e ao ona usitaia lona finagalo.

Tatou Tatalo i le Atua:--

1. Ina ia galue lona Agaga e faamalosia le soifua tapuai o tagata ia te ia.
2. Ina ia a’oa’oina o tatou tagata ina ia tapuai ia te ia i le agaga ma le faamaoni i taimi uma.
3. Ina ia faamanatu mai pea ia i tatou o le tapuaiga i le suafa o le Tamā, le Alo, ma le Agaga Paia, ua le na o tagata, a o le soifua ma le ola i le alofa ma le faamaoni i aso uma.

Fepuari 16, 2019

Tusi Faitau: loane 7: 37 - 39;

Matua: loane 7: 38 "O sē faatuatua ia te a'u, e faapei ona fai mai o le tusi, e tafe mai o vaitafe mai i totonu ia te ia, o le vai ola lava."

Manatu Autu: FANAUFUINA IA KERISO

Tatou Faafetai i le Atua:--

1. Ona o le avanoa e toe fanaufouina ai o tatou tagata mai le agasala.
2. Ona o ana meaalofa faaleagaga ua foaiina mai i le tagata e pei o le talitonu ma le faatuatua e faaolaina ai.
3. Ona o lesu Keriso le meaalofa sili ua faaolaina ai le tagata e ala i le faatuatua.

Tatou Faatoese i le Atua:--

1. Ona o le tuinanau o le tagata i le agasala ua faigata ai ona talia le ola fou ia Keriso.
2. Ona o le papa'u o lo tatou faatuatua ma le talitonu ua le moni ai le ola ofoina atu mo le Atua ma lona finagalo.
3. Ona ua avea le matagofie faatosina o lenei lalolagi ua faigata ai ona fanaufouina o tatou agaga.

Tatou Tatalo i le Atua:--

1. Ina ia susulu mai lona malamalama i o tatou loto ma agaga e fanaufouina o tatou olaga ma avea ai ma fanau o le malamalama.
2. Ina ia avea Keriso ma o tatou sootaga i aso uma e puna a'e ai pea le vaiola, o le Agaga Paia lea e utufia ai o tatou agaga i le vaiola.
3. Ina ia auina mai lona mana e faaaupagaina ai o tatou tagata e mafai ai ona tatou tete'e atu i le malosi o le fili ma ana 'au.

Fepuari 23, 2019

Tusi Faitau: Isaia 53: 7 - 12;

Matua: Isaia 53: 10 "A ua finagalo le Alii e tu'imomomo ia te ia, ua ia faatigaina o ia; pe afai na te faia se taulaga mo agasala, ona iloa lea e ia o lana fanau, e faalevavevaina ona aso, o le finagalo foi o le Alii e manuia lea ia te ia."

Manatu Autu: SAUTUALASI FAAMANUIAGA O LE FAIA O LE
FINAGALO O LE ATUA

Tatou Faafetai i le Atua:--

1. Ona o le faamaoni o lona alofa mo lana fanau faatuatua ma talitonu ia te ia.
2. Ona e ui ina le atoatoa le tagata, a ua tuu avanoa pea ia e ala i faamanuiaga e ala mai le faia o lona finagalo.
3. Ona o le silisili ese ma le atoaga o ana galuega e ala ia Iesu Keriso lona maliu ma lona Toe Tu Manumalo ua tatou oaoa ai nei i le matagofie o lona alofa.

Tatou Faatoese i le Atua:--

1. Ona o le faapito o lo tatou alofa ua na o e tatou te fiafia i ai ma alolofa mai.
2. Ona o le le moni ma le faatumutumulima o lo tatou alofa ua le atoatoa lo tatou loto atu e faia lona finagalo.
3. Ona o le maaa o tatou loto ua faigata ai ona tatou malamalama ma talia ana afioga a'oa'o mai.

Tatou Tatalo i le Atua:--

1. Ina ia aua nei mate le lamepa i loto o lana fanau faatuatua, e le faailoga tagata ai, pe faaituau ma faapito le alofa, a ia alofa i soo se tagata aemaise e o manaomia le fesoasoani.
2. Ina ia tumau mai lona Agaga i o tatou tagata e faamalosi mai e faia le mea moni e tatau ona faia e tusa ma lona finagalo.
3. Ina ia a'oa'o mai pea ana afioga mo tatou, tatou te savavali ma ola ai i aso uma lava.

MATI

Mati 2, 2019

Tusi Faitau: Efeso 4: 25 - 32;

Matua: Efeso 4: 32 "A ia outou feagalelei, ia femutimutivaleai lo outou alofa, ia fefaamagaloi outou, faapei ona faamagaloina outou e le Atua ia Keriso."

Manatu Autu: FAATA'ITA'I I LE KERISO

Tatou Faafetai i le Atua:--

1. Ona o le soifua o lona lava alo pele ua ofoina mai e fai ma faataitaiga mo tagata faatuatua uma ina ia soifua ma ola ai.
2. Ona o lea lava soifua ua mafai ai e tagata faatuatua uma ona faataua ma maua le nofo fealofani ma nisi tagata.
3. Ona o Keriso ma lona maliu ma lona toe tu ua faamagaloina ai a tatou agasala ma tatou faamagalalo atu ai foi i nisi o tatou uso.

Tatou Faatoese i le Atua:--

1. Ona o lo tatou vaivai e soifua ma ola e pei ona soifua ai Keriso ona o lona finagalo lea mo tatou.
2. Ona o le faigata ona tatou maua le loto faamagalalo ma le loto alofa i o tatou tuaoi.
3. Ona o lo tatou le tumau i lona finagalo a ua faia pea o tatou loto ua tatou le maua ai le nofo fealofani.

Tatou Tatalo i le Atua:--

1. Ina ia faatumauina o tatou loto i le mana o lona Agaga Paia e mafai ai ona tatou faia lona finagalo.
2. Ina ia totoina i o tatou loto le feagaleleiai, le femutimutivaleai o lo tatou alofa, ma ia maua le loto fefaamagalaloai o le tasi i le isi.
3. Ina ia faamanatu mai pea i o tatou loto, ma mafaufau le mutimutivale o le alofa o Keriso ua ofoina mai ai lona soifua paia atoa ina ia faamagaloina ma faaolaina tagata uma.

Mati 9, 2019

Tusi Faitau: Sefanaia 3: 14 - 20;

Matua: Sefanaia 3: 17 “O le Alii lou Atua i totonu ia te oe o le malosia ia; na te faaolaina; e olioli o ia ia te oe ma le fiafia; o lona alofa e lē fetalai ai o ia; e olioli lava o ia ia te oe ma le ofo fiafia.”

Manatu Autu: E LOTOLOTOI LE ATUA MA I TATOU

Tatou Faafetai i le Atua:--

1. Ona o lona silisili se ma lona mafuta mai pea ia i tatou i taimi uma ma aso uma, i le solo lelei po o faigata, e i ai pea ma i tatou.

2. Auā o ia o lo tatou fesoasoani silisili i o tatou puapuaga, e ui ina vaivai, a ua tatou mautinoa lona lotolotoi i o tatou mafatiaga.
3. Ona o lona malosi ua tatou malolosi uma ai, o ia o lo tatou faaolataga ua tatou maua ai le filemu ma le mafanafana i o tatou mafatiaga.

Tatou Faatoese i le Atua:--

1. Ona o lo tatou ola masalosalo i lona auai mai ia i tatou i le tele o taimi aemaise lava i taimi o faigata ma puapuaga.
2. Ona o lo tatou le tumau i ana afioga folafola mai, a ua tatou fia malolosi pe a fesouaina lo tatou ola.
3. Ona o le vaivai o lo tatou ola vivii ma faafetaia lona lotolotoi ma lona auai mai i o tatou mafatiaga.

Tatou Tatalo i le Atua:--

1. Ina ia aveese ia i tatou le fefe ma le popole i taimi tatou te vaivai ai, a ia faateleina lo tatou mautinoa ma le malosi i lona auai mai.
2. Ina ia faatumaaina o tatou tagata i lona mana e faamalosi ai lo tatou ola tauivi i taimi uma.
3. Ina ia a'oa'oaina tatou o le Alii o lo tatou malosi ia o loo i totonu ia i tatou na te faaolaina.

Mati 16, 2019

Tusi Faitau: loane 15: 1 - 9;

Matua: loane 15: 4 "Ina tumau ia o outou ia te a'u, o a'u foi ia te outou."

Manatu Autu: TUMAU I LE KERISO

Tatou Faafetai i le Atua:--

1. Ona o lona manatu alofa ia i tatou ma valaau ina ia tatou tumau ia te ia.
2. Ona o le manuia e maua e tagata e tumau ia te ia, e tumau foi o ia ma i latou.
3. Ona o lona alofa ia i tatou e ala ia Iesu Keriso, o lona maliu ma lona toe tu ua mautinoa ai lona tumau ia i tatou.

Tatou Faatoese i le Atua:--

1. Ona o lo tatou ola femoumouai a ua le tumau ia te ia.
2. Ona ua avea lo tatou le tumau ia te ia, ua tatou le fua mai ai i amio e tatau ai.

3. Ona o le tuinanau o tatou loto ua le mafai ai ona tatou tumau i ana afioga ma ua le savavali e tusa ma lona finagalo.

Tatou Tatalo i le Atua:--

1. Ina ia fesoasoani mai ia tatou filifiliga ina ia tatou tumau ia Keriso ma ola ai.
2. Ina ia a'oa'oina tatou, e le mafai ona tatou fua pea afai tatou te le pipii ma tumau ia te ia le vine moni.
3. Ina faaauppegaina tatou e lona Agaga Paia ina ia mafai ona tatou tausia ana poloaiga ma tatou tumau ai i lona alofa ma lona olioli, ia atoatoa foi lo tatou olioli.

Mati 23, 2019

Tusi Faitau: Mareko 10: 42 -45;

Matua: Mareko 10: 45 "Auā foi o le Atalii o le tagata na le sau o ia ina ia auauna tagata ia te ia, a e peitai ia auauna o ia, ma foaiina atu lona ola e togiola mo tagata e toatele."

Manatu Autu: AUAUNA A IESU KERISO

Tatou Faafetai i le Atua:--

1. Ona o le soifua o Iesu Keriso o le ata manino lena o le soifua auauna ma le soifua ofoina atu.
2. Ona ua faailoa mai ia i tatou le uiga moni o le avea ma soo, ia auauna ma foaina atu le ola mo nisi.
3. Ona o le faataitaiga sili na faia e Keriso na foaiina mai lona soifua na maliu ma toe tu e fai ma togiola e sui ai tagata e toatele.

Tatou Faatoese i le Atua:--

1. Ona o lo tatou mumusu i le tele o taimi e faatino lona finagalo ina ia avea ma auauna i soo se tagata.
2. Ona o lo tatou mapo mamalu, ua faigata ai ona tatou o ifo e fai ma auauna.
3. Ona o le faigata ona goto ifo i o tatou loto le uiga moni o ana a'oa'oga, o se fia sili, ia fai ma auauna, o se fia muamua e fai ma e mulimuli.

Tatou Tatalo i le Atua:--

1. Ina ia a'oa'oina tatou i le uiga moni o le avea ma soo, e le ina auauna mai tagata, a ia auauna ma foaina le ola mo nisi.
2. Ina ia faaauepegaina o tatou tagata e maua ai le loto maualalo e talia ai le soifua ofoina atu e tusa ma le finagalo o le Atua.
3. Ina ia aumai le loto tele e talepeina ai pa vaeloto o le fia mamalu ma le fia faamaepaepa a ia faaaogaina le soifua ma le ola e auauna ma tautua ai le ekalesia ma le galuega a le Atua.

Mati 30, 2019

Tusi Faitau: Salamo 65: 1 - 4;

Matua: Salamo 65: 2 "...le faafofoga tatalo e, e o atu ia te oe tagata uma lava."

Manatu Autu: O LE ATUA FAAFOFOGA TATALO

Tatou Faafetai i le Atua:--

1. Ona o lona manatu mai ma faafofogaina a tatou tatalo ma talosaga.
2. Ona o lona tali mai ia tatou talosaga e tusa ma lona finagalo.
3. Ona o le avanoa tatou te fesootai atu ai ia te ia e ala i le tatalo ma e tali mai e tusa ma lona finagalo i mea tatou te manuia ai.

Tatou Faatoese i le Atua:--

1. Ona o le vaivai o lo tatou soifua ma le ola tatalo i aso uma.
2. Ona o lo tatou taumamao ma ia i taimi solo lelei, ae a fesouaina loa lo tatou ola ona le asa lea ona tatou tatalo ma valaau i lona suafa mo se laveaina.
3. Ona o le le faamasani o tatou loto talitonu e ofoina ai a tatou tatalo.

Tatou Tatalo i le Atua:--

1. Ina ia a'oa'oina pea o tatou tagata i ana afioga folafola e tuuina atu ia te ia mea uma tatou mananao ai e ala i le tatalo.
2. Ina ia galue lona agaga e faamalosia ma faatuputeleina lo tatou fiafia e mafuta atu ia te ia e ala i le tatalo.

3. Ina ia faamanatu mai pea lona Agaga ina ia tatou mautinoa na te faafogaina a tatou tatalo uma ma tali mai e tusa ma lona finagalo.

APERILA

Aperila 6, 2019

Tusi Faitau: loane 12: 44 - 50;

Matua: loane 12: 45 “O lē vaai mai foi ia te a’u, e vaai atu o ia ia te ia ua auina mai a’u.”

Manatu Autu: IA TAULAI LE VAAI IA IESU

Tatou Faafetai i le Atua:--

1. Ona o Iesu ua avea ma malamalama o le lalolagi ina ia le tumau i le pouliuli se tasi e faatuatua.
2. Ona o ana afioga ua a’oa’o mai, o le ua vaai ia Iesu ua vaai foi i le Atua.
3. Ona o lana valaau alofa ina taula’i la tatou vaai ia Iesu tatou te maua ai le ola e faavavau.

Tatou Faatoese i le Atua:--

1. Ona ua faigata ona tatou iloa le uiga moni o Iesu o ia o le malamalama, le upu moni ma le ola.
2. Ona ua tele ina punitia la tatou vaai ia Iesu ona o le agasala.
3. Ona o le vaivai o lo tatou faatuatua ma lo tatou tauaso faaleagaga.

Tatou Tatalo i le Atua:--

1. Ina ia faapupulaina o tatou loto e malamalama ai i le uiga moni o Keriso mo tatou.
2. Ina ia a’oa’oina tatou i le taua o le taulai o la tatou vaai ia Iesu aua o le Atua foi lena e maua ai le ola.
3. Ina ia a’oa’oina pea tatou o Iesu Keriso o ia o le malamalama, upu moni ma le ola.

Aperila 13, 2019

Tusi Faitau: Isaia 53: 1 - 5;

Matua: Isaia 53: 5 “A ua manu’a o ia ona o a tatou solitulafono, ua momomo o ia ona o a tatou amioleaga;”

Manatu Autu: O TATOU NA POGAI AI PUAPUAGA O LE ALII

Tatou Faafetai i le Atua:--

1. Ona o ona manua ma ona faalavalva ua malolo ai i tatou ai a tatou solitulafono ma amioleaga uma lava.
2. Ona o le faamomomoina ma le faamaligiina o le tino ma le toto o Keriso ua faaali tino mai lona alofa mo ona tagata.
3. Ona o le toe tu manumalo o Keriso ua faaalialia ai le atoatoa o le faaolataga mo le tagata.

Tatou Faatoese i le Atua:--

1. Ona e a tatou e agasala ma amioleaga ae puapuagatia ai le alo pele o le Atua e leai se agasala.
2. Ona o le māmā i manatu o le tagata o le soifua paia o Iesu ua faamanualia ona o solitulafono a le tagata.
3. Ona o lo tatou fiafia pea e fai le agasala e aunoa ma le salamo.

Tatou Tatalo i le Atua:--

1. Ina ia toe fuataina o tatou olaga e ala i le maliu ma le toe tu manumalo o Iesu Keriso.
2. Ina ia faaalialia le Keriso toe tu i o tatou ola i aso uma.
3. Ina ia avea tatou ma ave feau o le Keriso toe tu i le lalolagi.

Aperila 20, 2019

Tusi Faitau: Ioane 21: 15 - 17;

Matua: Ioane 21: 15 “Simona e, le atalii o Ioane, pe sili mai lou alofa ia te a’u, i o latou nei?”

Manatu Autu: E FAAPEFEA ONA FAATINO LO TATOU ALOFA IA IESU?

Tatou Faafetai i le Atua:--

1. Ona o lona maliu ma le toe tu o lona Alo pele ua faaali ai lona alofa tunoa ina ia faaolaina le lalolagi.

2. Ona o lona tuu avanoa mai i le tagata faafiti ina ia toe fuataina ma faatino lona alofa e ala i le avea ma leoleo mamoe
3. Ona o lona Agaga ua maua ai le malosi e ola auauna e faatino la tatou tautua ia te ia i soo se ala.

Tatou Faatoese i le Atua:--

1. Ona tatou te pepese ma taulagi le alofa ae ua tele ina tatou le faatinoina.
2. Ona ua tele ina faapito ma faaituau lo tatou alofa i e alolofa mai.
3. Ona o lo tatou ola tau ma sui, ua faigata ona tatou maua le loto fefaamagaloai.

Tatou Tatalo i le Atua:--

1. Ina ia aveesea mai ia i latou le faailoga tagata ma manatu faapito a ia tutusa tagata uma.
2. Ina ia foai mai lona Agaga e mafai ai ona tatou faatino lo tatou alofa ia te ia ma tagata uma.
3. Ina a'oa'oina tatou, o lona maliu ma lona toe tu manumalo ua faaalua ai le moni o lona maliu ina ia faamagalo ma faaolaina i tatou.

Aperila 27, 2019

Tusi Faitau: Mareko 16: 9 - 18;

Matua: Mareko 16: 15 "Ua fetalai atu foi o ia ia te i latou, O atu ia outou i le lalolagi uma, ina tala'i atu ai le tala lelei i tagata uma lava."

Manatu Autu: TATOU O LOA!

Tatou Faafetai i le Atua:--

1. Ona o le toe tu manumalo o Keriso ua faamaoni ai le moni o le tala lelei.
2. Ona o lona valaauina o lo tatou faatauvaa e fai ma sāvāli o le tala lelei i le lalolagi uma.
3. Ona o lona mana e tautoaluaina ai la tatou galuega ua maua ai le malosi ma le loto tele e faatino ai lo tatou valaauina.

Tatou Faatoese i le Atua:--

1. Ona o lo tatou le faamaoni e tusa ma lo tatou valaauina i le tele o taimi, ua tele ina faatumutumulima la tatou auaunaga.
2. Ona ua le gatusa la tatou molimau ma lo tatou olaina, ua tele ina feteena'i.
3. Ona ua le moni le ofoina atu o tatou ola e faatino ai la tatou auaunaga ona o tuinanau o le tino.

Tatou Tatalo i le Atua:--

1. Ina ia foai mai le loto tele ma le faamaoni e faatino ai la tatou galuega talai.
2. Ina ia faaauppegaina tatou e lona mana e maua ai lo tatou malosi e tete'e ai le fili e faafelavei i la tatou auaunaga.
3. Ina ia a'oa'oina tatou, e le se mea faaleaoga lo tatou ola ofoina mo le tala lelei.

ME

Me 4, 2019

Tusi Faitau: Esera 1: 1 - 11;

Matua: Esera 1: 1 "O le tausaga muamua o Kuresa le tupu o Peresia, na faaosoina ai e le Alii le manatu o Kuresa le tupu o Peresia, ina ia taunuu ai le afioga a le Alii na fai mai e Ieremia, ona ia tala'iina lea o le upu i lona malo uma, ma na tusia i le tusi ua faapea"

Manatu Autu: O LOO LU'ITAUINA PEA I TATOU E LE ATUA.

Tatou Faafetai i le Atua:--

1. Ona e le tuulafoa'iina lava le tagata o le faauluuluga o ana galuega mamana.
2. Ona ua avea le Tusi Paia, o afioga tusia ua tatou iloa ai le tala faasolopito o mea ofoofogia sa taita'iina ai lona nuu.
3. Ona o tala tusia ma upu tuugutu mai i o tatou tuua ua tofafa i tuugamau, ua tatou iloa ai le tala i le Ekalesia Kerisiano i Samoa aemaise Iesu Keriso.

Tatou Faatoese i le Atua:--

1. Ona ua tatou tuu fesili pea e tusa ma lona alofa mai.
2. Ona lo tatou loto masalosalo ma le loto faalotolotolua ona o tatou lava tuinanau eseese.

3. Ona o lo tatou solomuligofie i luitau o le olaga, ma lē talia le tala lelei na folafola mai i tausaga e tele ua tuanai.

Tatou Tatalo i le Atua:--

1. Ina ia faamalosia o tatou loto i le ola talitonu ma le faatuatua moni ia te ia.
2. Ina ia avea pea i tatou e fai sulu e mumu, e suluia ai Samoa ma le lalolagi atoa.
3. Ina ia faavae o tatou lagona i ana afioga, e maua ai le fiafia tatou te sailiili ai i ana afioga.

Me 11, 2019 *Aso Sa o Tinā*

Tusi Faitau: Faataoto 31: 10 - 30;

Matua: Faataoto 31: 10-12 “O le āva amio lelei, o ai ea se ua maua? e silisili lona tau i penina. Ua faatuatua ia te ia le loto o lana tane; e le mativa o ia i oloa. E agalelei oa ia ia te ia, a e le agaleaga i aso uma o lona olaga.”

Manatu Autu: O TINĀ O MEAALOFA MAI LE ATUA.

Tatou Faafetai i le Atua:--

1. Ona o ana meaalofo na foai mai e ala i tinā uma o le lalolagi.
2. Ona o le agaga faapalepale i o tatou tinā, o se tasi o auupega sili ua latou faasoā mai mo i tatou.
3. Ona o le ologa faaletinā ua tatou lagona ai le mafanafana ma le malamalama i lona alofa.

Tatou Faatoese i le Atua:--

1. Ona ua tatou le tausia ana poloaiga ia tatou ava i o tatou tinā ma tamā, ina faalevaleva ai o tatou aso.
2. Ona e le o atoa ia i tatou le alofa o Iesu Keriso, o le alofa i e ua agaleaga mai, ma tatou ola fefaamagaloa’i.
3. Ona o loo faatamala pea matua i tiute faamatua, ua manatu mamā i le tausiga o fanau, o tofi mai le Atua.

Tatou Tatalo i le Atua:--

1. Ina ia faamanuia i tinā uma o le lalolagi, faiva ma tiute alofilima auā le tausiga o fanau ma aiga.
2. Ina ia tatou maua le agaga o le agalelei atu i soo se tasi, ma ia fai foi ma masani le alofa e le faatuaoia.

3. Ina ia faatuatuaina i tatou e aiga, nuu, ma faalapotopotoga aemaise le Ekalesia a le Atua.

Me 18, 2019

Tusi Faitau: Roma 16: 1 - 16;
Matua: Roma 16: 14 – 16 “Ua ou alofa atu ia Asugerito, ma Fegona, ma Herema, ma Pateropa, ma Heremea, ma le au uso o ia te i latou. Ua ou alofa atu ia Filoloko ma Iulia, o Nereu foi ma lona tuafafine, ma Olumepa, ma le au paia atoa uma o ia te i latou. Ia outou fealofani i le feasogi paia. O loo alofa atu ia te outou ekalesia a Kersio.”

Manatu Autu: TUSITUSIGA FAAVAE I LE ALOFA

Tatou Faafetai i le Atua:--

1. Ona o auala eseese ua fesootai ai le au faatuatua uma i le lalolagi, e le na o le tatalo, a o tusi au alofa e pei ona faia e Paulo.
2. Ona o lana faasoā mai i lana aufaigaluega ua a'oa'oina ai i tatou ina ia tatou fefaamafanafana'i.
3. Ona o le mafutaga mafanafana ma isi uso auā ua atagaia ai lo tatou faatinoina o lo tatou ola faaso'o o Keriso.

Tatou Faatoese i le Atua:--

1. Ona ua tatou augatatā e tusitusi ni alofaaga ma ni faamanuiaga mo Kerisiano ua le o vaai i ai.
2. Ona ua itiiti taimi tatou te alofa ai ma faamanuia atu i isi, a ua tele taimi e pulea ai o tatou loto e le tiapolo.
3. Ona ua tatou iloa a'oa'oga a le Tusi Paia e faataua i le ola mafuta faatasi i le finagalo o Keriso, a ua tatou le faatinoina ona o le manatu faapito ma le faasausili.

Tatou Tatalo i le Atua:--

1. Ina ia faamalosiā lo tatou naunau ia alofa ma faamanuia atu i isi tagata fafo atu o le lio o tatou aiga, uo ma e masani.
2. Ina ia aveā i tatou ma tagata e fiafia e mafuta i le finagalo o le Atua.
3. Ina ia aveā i tatou ma faamanuiaga i loto ma agaga o tagata uma, ina ia soifua filemu ai i le mafuta fealofani ma felagolagomai i le feasogi paia.

Me 25, 2019

Tusi Faitau:

Mika 4: 1 - 7;

Matua:

Mika 4: 2 - 3 "...auā e alu atu le tulafono mai Siona, o le afioga foi a le Alii mai Ierusalema. E faamasino foi o ia i nuu e tele, e a'oai atu foi i nuu malolosi e mamao; ona latou tu'i ai lea i a latou pelu e fai ma uamea o suotosina, o latou tao foi e fai ma polo teu vine; e le sii atu foi le pelu e le tasi nuu i le tasi nuu, latou te le toe a'oa'o foi i taua."

Manatu Autu: O LOO LU'ITAUINA PEA I TATOU E LE ATUA.

Tatou Faafetai i le Atua:--

1. Ona o lona finagalo alofa o lo o faailoa mai i le Tusi Paia e faatupuina ai lo tatou faatuatua ina ia tatou faalogo ma le gaua'i.
2. Ona o lo o ia manatu mai pea i aso e nonofo filemu ai tagata uma ma malo uma o le lalolagi.
3. Ona o lona le tuulafoaiina o le tagata i le agasala, ae a'oa'o, a'oa'i, faatonu ma faapoto i ana afioga uma mai le Tusi Paia.

Tatou Faatoese i le Atua:--

1. Ona o lo tatou ola faatamala i le suesue ma faitauina o lana Tusi Paia ua tatou iloa ai lona alofa ma le amiotonu.
2. Ona ua tatou faaaogaina pea o tatou lagona o le agasala, e fai ma auupega malolosi tatou te sii taua atu ai i isi.
3. Ona ua le mamafa ia i tatou faaaliga a le Atua mai le Tusi Paia e faatatau mo le a'oa'oina o i tatou i le ola faavavau.

Tatou Tatalo i le Atua:--

1. Ina ia lagona e tagata uma ma malo uma le taua o le Tusi Paia, o afioga ola ma tumau a le Atua.
2. Ina ia fesoasoani mai le Agaga o le Atua e suotosinaina o tatou loto, tatou te iloa ai faaaliga a le Atua.
3. Ina ia faia pea lona finagalo i le lalolagi e pei ona faia i le lagi, ia oo mai lona malo, ia fai malo uma i ai tagata uma ma atunuu uma.

IUNI

Iuni 1, 2019

Tusi Faitau: Faataoto 8: 22 - 31;

Matua: Faataoto 8: 29 - 31 “A o tofia e ia le tuaoi o le sami, ia le sopoia e lona suāsami lona matafaga; a o tusia e ia faavae o le lalolagi; na ou i ai ma ia. o a’u o le tufuga; na fai foi a’u mona fiafia i lea aso ma lea aso’ sa ou olioli i ona luma i aso uma lava. Sa ou olioli i mea e mau ai tagata i lona lalolagi; o lo’u fiafia foi, sa i le fanau o tagata lea.”

Manatu Autu: O LE MATA’U LAVA I LE ATUA, O LE AMATAGA O LE POTO.

Tatou Faafetai i le Atua:--

1. Ona ua avea lo tatou tusi faitau ma faapogai ua tatou iloa ai le poto ma le malamalama i le tala e uiga i le faaolataga.
2. Ona o le alofa o Iesu Keriso i le tele o tausaga ua tuanai o le pogai ma le autu o le viiga ma le faafetai.
3. Ona o le foafoaga paia ua faitauina ai le tagata e fai ma palealii o ana galuega silisili.

Tatou Faatoese i le Atua:--

1. Ona o loo tatou mafaufau faatamala i le tausiga o tatou ola.
2. Ona ua tatou faatamala ma fatalale i le a’oa’oina o le poto, tatou te iloa lelei ai lo tatou ola i le lalolagi ua foa’i mai mo i tatou.
3. Ona ua faatamaia lana foafoaga e le tagata sa tofia ma palealii.

Tatou Tatalo i le Atua:--

1. Ina ia maua pea le poto ma le malamalama tatou ola fealofani ai ma le foafoaga, ma ia iloa e le tagata lona va fesootai ma le Atua foafoa.
2. Ina ia tatou galulue faatasi, maua le fealofaniga ma le feoeoea’i ina ia tumau ai le olioli i totonu ia i tatou.
3. Ina ia tatou iloa le matagofie o le lalolagi.

Iuni 8, 2019

Tusi Faitau:

II Nofoaiga Tupu 5: 1 - 14;

Matua:

II Nofoaiga Tupu 5: 13 - 14 “O e ili pu ma e o pepese ua peiseai o se toatasi, ua tasi le leo i le viiga ma le faamanu i le Alii; ua latou pepese faatasi ma pu, ma sumepalo, ma laaupese, e vivii atu ai i le Alii, o loo faapea atu, Auā e lelei o ia, auā e faavavau lava lona alofa, ona tumu ai lea o le fale i le ao, o le fale lava o le Alii. Ua le mafai ai le au faitaulaga ona tutū e auauna ona o le ao; auā na tumu le fale o le Atua i le pupula o le Alii. ”

Manatu Autu:

MANATUA LE FEAGAIGA NA OSIA MA LE ATUA

Tatou Faafetai i le Atua:--

1. Ona o le faamanatu ia Solomona i le taua o le feagaiga na osia ma lona nuu e ala ia Mose.
2. Ona o le tuu avanoa mai mo tatou le fanau fefoifoia'i o lona faapalepale ua maua ai le avanoa e toe foi atu ai ia te ia.
3. Ona o le pupula o le Alii, ua ao ai Samoa, ua suluia ai lona malamalama i totonu o lona fale.

Tatou Faatoese i le Atua:--

1. Ona ua tatou manatu ua na o le malumalu e afio ai le Atua, a oo i taimi e fetaia'i ma faigata, ua vave ona galo le tausiga a le Atua e ala i lana feagaiga.
2. Ona ua le mafai ona maua le manatu ma le agaga e tasi.
3. Ona ua tatou faoa ona viiga, ua logo malie i le faalogo le faaviivii mai o tagata, ua manatu ai o le malosi ua mafua ai ia faamanuiaga.

Tatou Tatalo i le Atua:--

1. Ina ia tatou ola ma soifua i lona finagalo, ia tatou ola faatasi ma lana faasinoga, ma maua le usiusitai i lona Agaga Paia.
2. Ia maua lo tatou malosi e unaia ai tagata ina ia ulufale i totonu o le fale o le Atua.
3. Ia atagia le soifua auauna ia te ia i lo tatou ola, ma ia talitonuina la tatou molimau i lelei o le Atua.

Iuni 15, 2019 Aso Sa o le Penetekoso

Tusi Faitau: Galuega 2: 1 - 13;

Matua: Galuega 2: 1 - 2 “Ua oo atu foi i le aso Penetekoso, sa i ai uma lava i latou i le mea e tasi ma le loto gatasi. Ona faafuasei mai lea o le taalili mai le lagi, peiseai o le matagi ua agi tele mai, ua tumu uma ai le fale sa latou nonofo ai.”

Manatu Autu: O LE MALOSI E UNAIA LOU FAAMOEMOE

Tatou Faafetai i le Atua:--

1. Ona o lona Agaga Paia ua fai ma toomaga, ua tua iai le vaivai, a e afuafua mai ai le mea sili.
2. Ona ua mafai ona tauaofia i tatou uma i lona Agaga faasoa, ua maua ai le loto gatasitasi i lalo o lona faamalumaluga.
3. Ona o lona faamaoni i le tagata na ia faia, e ala i le tausiga alofa i aso uma, e ui o le tagata femoumouai ma le usiusitai i lona Agaga taumusumusu.

Tatou Faatoese i le Atua:--

1. Ona ua tatou le tuu avanoa i lona Agaga Paia, a ua tatou faalagolago i lo tatou malosi ao se iloa, ae galo ai le fesoasoani sili e ala i lona Agaga Paia lava lea.
2. Ona ua taina sese i tatou e leo ma agaga eseese, ua tutuli ai la ta faalogo i le fetalai mai o lona Agaga Paia.
3. Ona ua le mafai ona tatou maua le gatasitasi e pei ona atagia i le aso o le Penetekoso, a e ua fevaevaea'i ona ua tu faamauga o tatou lagona.

Tatou Tatalo i le Atua:--

1. Ia faaaupagaina pea i tatou e lona Agaga Paia, tatou taufetuli e auauna lona finagalo i le lalolagi.
2. Ina ia pai atu le galuega faamafanafana a le Ekalesia i tagata puapuagatia, ma avea ma ola fou i nofoaga o e ua mafatia.
3. Ina ia faamanuia i le lalolagi a o taumafai i ala e foia ai faafitauli o loo fesagai ma le lalolagi, ma ia saili i lona Agaga Paia e taitai i o tatou lagona ma manatu.

Iuni 22, 2019 Aso Sa o Tamā

Tusi Faitau: Salamo 50: 7 - 15;

Matua: Salamo 50: 14 - 15 “O le viiga ia e faia lea ma taulaga i le Atua; ia e avatu foi i lē e Silisili ese mea na e tauto ai. Ia e valaau foi ia te a’u i le aso e i ai le puapuaga; ou te laveaiina ai oe, ona e vivii mai ai lea ia te a’u.”

Manatu Autu: IA AUAUNA MA LE LOTO MAMĀ

Tatou Faafetai i le Atua:--

1. Ona o ala o lona alofa ua uma ona faatinoina ai le soifua paia o lesu Keriso, ua aumai ai le faaolataga.
2. Ona o faatonuga o le ola auauna ma le soifua tautua i aso uma, ua tuuina i lana Afioga Paia tatou te mulimuli ai.
3. Ona o lo tatou laveaiina i lona mana alofa, e ui ina galulue mo le ola fia tauia ae ua le faapea lona alofa mai.

Tatou Faatoese i le Atua:--

1. Ona o lo tatou ola fia pule i mea ua ia foai mai mo i tatou, ua tatou le iloa foi le Atua o le malosi uma.
2. Ona ua faamaualuga o tatou loto i mea ua tatou faia mo le Atua, ua tauvaleina lona alofa i le ola faafiamalosi.
3. Ona o taulaga ua avatu e le tagata, ina ua tatou to le i’u inati mo le Atua mai ana faasoa ua tele mo i tatou.

Tatou Tatalo i le Atua:--

1. Ina ia a’oa’o mai lona Agaga ia tatou iloa ona auauna ia te ia ma le faamaoni.
2. Ina ia faamanuia mai i ala eseese ua aumaia ai fesoasoani mo e mafatia i malo, faalapotopotoga, Ekalesia ma tagata uma.
3. Ina ia faamanuia i malo aufaatasi o loo naunau ia manuia atunuu o mafatia, ma malo tetele ua faalagolago i ai foi mo le faatinoina o ia fesoasoani.

Iuni 29, 2019

Tusi Faitau: loane 14: 15 - 24;

Matua: loane 14: 20 - 21 “ O le aso e iloa ai e outou, ou te i totonu o lo’u Tamā; o outou foi o i totonu ia te a’u, o a’u foi o i totonu ia te outou. O lē ua ia te ia a’u poloaiga ma tausi i ai, o ia lea e alofa mai ia te a’u; o lē alofa mai foi ia te au, e alofaina ia e lo’u Tamā; ou te alofa foi ia te ia, ma ou faaali ia te ia.”

Manatu Autu: IA TATOU MULIMULI I TULAGA AAO O LE ATUA

Tatou Faafetai i le Atua:--

1. Ona o le tele o lona manuia o loo sasa’a i ala eseese ua tatou talisapaia ma molimau i ai i le olaga nei.
2. Ona o lona a’oa’o mai ua tatou iloa ai le faatauvaa o le uiga o lo tatou ola, malamalama i lona mamalu ma lona silisili ese.
3. Ona o lē na mua’i faia le faaa’oa’o mo i tatou a o lona faamaite mea lelei e ao ai ia i tatou ona mulimuli ma auuna ai.

Tatou Faatoese i le Atua:--

1. Ona la tatou e fai, ese la tatou e a’oa’o atu, aemaise o lo tatou le fiafia ina ia tatou ola a’oa’oina.
2. Ona ua tatou le fia a’oa’oina e mulimuli ia te ia ona ua faapogisa ina i tatou i le suamalie o le lalolagi.
3. Ona o lo tatou le fia mulimuli i ona tulaga aao ma ana a’oa’oga ina ua tumu i tatou i a’oa’oga sese a le lalolagi e fano ai.

Tatou Tatalo i le Atua:--

1. Ina ia faamanuia ia i latou o loo feagai ma le faiva o le a’oa’o atu e le gata i totonu o potu aoga, aemaise o matata eseese i le poto salalau.
2. Ina ia manatua le galuega faamisionare o le a’oa’o atu o le tala i lona alofa tunoa ina ia tele ai agaga e faaolaina.
3. Ina ia faia se loto maualalo, o se loto fou, a o se loto mama i totonu ia i tatou e faaaoga ai i tatou uma, e fai ma faaa’oa’oga lelei i le finagalo paia o le Atua mo tagata uma.

IULAI

Iulai 6, 2019

Tusi Faitau: II Samuelu 5: 1 - 5;

Matua: II Samuelu 5: 2 "...na fetalai foi le Alii ia te oe, E te leoleo i lo'u nuu o Isaraelu, e fai foi oe ma ta'ita'i ia Isaraelu."

Manatu Autu: O LE FAIVA O LE TA'ITA'I, E LEOLEO MO LE MANUIA O TAGATA.

Tatou Faafetai i le Atua:--

1. Ona o lona alofa e tofia ma faauuina ai ta'ita'i e leoleoina le manuia o tagata, e ui lava e le atoatoa le taumafai ae finau mai pea lona agalelei ma tulai mai i le matagofie o le ola leoleo o ta'ita'i.
2. Ona o lona agalelei o loo galueaina ai ta'ita'i o aiga i faiva o matua e faafaileleina ai fanau, e ui lava ina tulai mai pea le faatamala i tiute faamatua, ae tumau lava le alofa leoleo tausii o le Atua.
3. Ona o le alofa finau mai pea o le Atua i le faapalepale ona o le vaivai o ta'ita'i o nuu, le atunuu ma le malo i o latou faiva ua filifili i faiva o leoleo e saili ai le amiotonu mo le manuia o tagata uma.

Tatou Faatoese i le Atua:--

1. Ona o lo tatou vaivai i le ola tauivi i le faiva o le ta'ita'i ua faauuina mo le leoleoina o le manuia o vaega uma ma tagata uma o le Ekalesia.
2. Ona o le faatamala o matua i le a'oa'oina lelei o fanau ia iloa ona ava ma mata'u i le Atua, ma ava i matua.
3. Ona o le vaivai o matai e faatinoina le ola faamaoni ma saili le amiotonu e ala i le leoleoina o nuu ua tofia ma faauuina i latou mo le manuia ma le filemu o tagata.

Tatou Tatalo i le Atua:--

1. Ina ia maua le mana musumusu o le Atua e ta'ita'i ai ma leoleo ai ma le manino le ola filemu ma le manuia o tagata uma.
2. Ina ia mafai ona manino faiva o ta'ita'i o aiga, nuu, ma le malo e saili ai ma le faalagolago i le mana musumusu o le Atua le toto'a ma le malamalama e faatino ai le amiotonu auā le manuia tutusa o tagata uma.

3. Ina ia maua e tagata uma le faalagolago i le mana o le Atua e ta'ita'iina ai ma leoleoina ai o latou olaga ma pulea ai le va-fealoaloa'i ma le va-fetausia'i ma tagata uma.

Iulai 13, 2019

Tusi Faitau: Amosa 7: 7 - 17;

Matua: Amosa 7: 15 "A ua avea a'u e le Alii sa ou mulimuli i le lafu mamoe, ma ua faapea mai le Alii ia te a'u, Alu ia, ina e vavalu i lo'u nuu o Isaraelu. "

Manatu Autu: E FETALAI MAI PEA LE ATUA I LE ALOFA MA LE AMIOTONU.

Tatou Faafetai i le Atua:--

1. Ona o le Atua fetalai mai pea i leo o tagata ua ia valaauina ma faauuina e folafola lona finagalo alofa e faatonu i lona fetalai mai pea.
2. Ona o le Atua e le tuulafoa'i i ona tagata ae fetalai mai lava i lona finagalo alofa ina ia tatou iloa ona ola i le va lelei ma le Atua i lona fetalai mai.
3. Ona o le alofa laveai o le Atua i lona fetalai mai pea, ua tatou maua ai le ola faafouina ma le ola faamagaloina i le mafutaga valalata ma ia i taimi uma.

Tatou Faatoese i le Atua:--

1. Ona o lo tatou naunau i oa a lenei lalolagi ma ua tatou toilalo ai i le alofa moni i le Atua, ma o tatou tuaoi.
2. Ona o lo tatou faaaogaina o le vaivai ma le le malamalama o tatou tuaoi ina ia maua ai lo tatou mamalu, viiga ma le tamaoiga.
3. Ona ua le moni le faatino ina o foliga alofa o le Atua i tagata o loo vaivai ma matitiva, ona ua tatou lima mau i faamanuiaga ua tatou maua.

Tatou Tatalo i le Atua:--

1. Ina ia fetalai mai pea ina ia tatou lagona lona finagalo alofa e avea ai i tatou ma lima ma vae o lana tala lelei.
2. Ina ia fetalai mai pea i lana Ekalesia e avea ma laveai i tagata o loo taomia ma manaomia le alofa laveai o le Atua.
3. Ina ia maua e tagata uma le faamanuiaga e ala i le siufofoga fetalai o le Atua e tausi ai le amiotonu e laei i le alofa mo tagata uma.

Iulai 20, 2019

Tusi Faitau: Salamo 89: 1 – 4, 15 - 18;

Matua: Salamo 89: 1 “O le alofa o le Alii ou te pese ai lava e faavavau; ou te faailoa atu i lo’u gutu lou faamaoni i lea tupulaga ma lea tupulaga.”

Manatu Autu: O LE PESE I LE ALOFA FAAVAVAU O LE ATUA
O LOO I AI LE MANUIA.

Tatou Faafetai i le Atua:--

1. Ona o le tumau ma le faamaoni o lona alofa mai i feagaiga ua tatou osiina ma le Atua i totonu o aiga ma le Ekalesia.
2. Ona o lona a’oa’o mai pea i tatou ia tumau ma faamaoni i le iloa ona pese i le faavavau o lona alofa i totonu o aufaipese ma galuega laveai a le Ekalesia e iloa tino ai le faavavau o foliga alofa o le Atua.
3. Ona o le Atua ua tatou iloa ai le olioli ma le fiafia moni i le uiga o feagaiga e tumau i le faamaoni i le alofa o le Atua.

Tatou Faatoese i le Atua:--

1. Ona ua le mafai ona tumau lo tatou faamaoni e ola ma faatino le alofa o le Atua i aso ma taimi uma.
2. Ona ua tatou faavaivai e ofoina leo malie ua tatou maua ma foai mai e le Atua e tautua ai i totonu o aufaipese ma vivii ai i le Atua i le ola tapuai.
3. Ona ua tatou saili le ola fiafia ma le olioli moni i ala sese ma ala faatosina o le olaga le tumau i le mafutaga ma le Atua o loo iai le olioli moni e faavavau.

Tatou Tatalo i le Atua:--

1. Ina ia avea i tatou uma ma tagata e tumau i le ola tautua i le faamaoni i le faatinoina o galuega, e faailoa ma folafola atu ai le viiga o le alofa o le Atua.
2. Ina ia utupupuina ola o tagata o le Ekalesia ma le au faatuatua i le poto e a’oa’oina ai pese mo viiga o le Atua.
3. Ina ia tatou popoto e faaoga upu matagofie e momoli ai le viiga ma le faamanūina o le matagofie o le alofa ma le faamaoni o le Atua.

Iulai 27, 2019

Tusi Faitau: loane 6: 1 - 14;

Matua: loane 6: 9 “O loo iinei le tama o ia te ia areto karite e lima, ma nai i’a iti e lua lau; ae aumā ea ia mea ia i latou e toatele?”

Manatu Autu: VAVEGA O LE ALOFA E TALI MANAO

Tatou Faafetai i le Atua:--

1. Ona o le alofa o le Atua e ala i lona Alo i lana galuega folafola ma vavega e faapupulaina le matagofie o le alofa saili mai pea o le Atua.
2. Ona o le galuega laveai mo tagata ua fia aai ma fia feinu i le lalolagi i le finagalo o le Atua, ma ua latou maua le femalieina i o latou mana’o.
3. Ona o le faatuatua ua foa’iina mai e le alofa tunoa o le Atua tatou naunau ai ma finau ai e saili le amiotonu ma faasoa le tamaoaiga i tagata o loo ola matitiva i le lalolagi.

Tatou Faatoese i le Atua:--

1. Ona ua tatou le faamaoni i le galuega laveai i le folafola atu lea o le alofa o le Atua i ala eseese e faatino ma faasoa atu ai le tamaoaiga i tagata matitiva i le lalolagi.
2. Ona ua tatou mumusu e foai mo le galuega laveai a le Atua i nofoaga o le lalolagi ua mafatia i le mativa ma le le tagolima.
3. Ona ua tatou teena musumusuga o le Agaga i galuega lelei e tatau ona tatou faatinoina e iloa ai foliga alofa o le Atua.

Tatou Tatalo i le Atua:--

1. Ina ia tatou ola i le olaga mataala i le faatinoina o galuega fesoasoani mo tagata ua matitiva i meaai faaleagaga ma le upu o le ola na soifua ai Iesu Keriso.
2. Ina ia tatou faamalosi e foai ma faasoa atu le tamaoaiga e ala i galuega fesoasoani mo i latou o loo ola i nofoaga ua oge i meaai ma vai inu.
3. Ina ia tatou finafinau e ofoina atu ola o fanau a le Ekalesia ua uma ona a’oa’oina ma faauuina i le aoga faafaifeau i Kanana Fou e folafola le tala lelei i atunuu o loo galala i le upu i le faolataga a le Atua.

AUKUSO

Aukuso 3, 2019

Tusi Faitau: Efeso 4: 1 - 16;

Matua: Efeso 4: 13 “seia oo atu o i tatou uma lava i le loto gatasi i la le faatuatua, ma le iloa lelei o le Alo o le Atua, ia fai foi ma tagata matua, ia oo i le fua o le ua matua, e tatau ma le tumu o Keriso. ”

Manatu Autu: O LE ILOA TAUSI LE VA FEALOLOA'I, LE VA FETAUSIA'I, MA VA NONOFO E MOLIMAUINA LE OLA FEALOFANI

Tatou Faafetai i le Atua:--

1. Ona o le mana o le Agaga e galueina o tatou olaga faatuatua i le alofa o le Atua sa faatinoina e Iesu Keriso le Alo ina ia tatou iloa ola fealofani.
2. Ona o le valaauina o tatou tagata e galulue i le avea ma tino o le Ekalesia, ma mafai ai ona tatou iloa le taua o le va fealoaloi, le va fetausiai ina lelei le va nonofo e maua ai le manuia ma le filemu.
3. Ona o le alofa tunoa ma le faaolataga ia Iesu Keriso, le papatisoga, ma le mana o le Agaga e faatonutonu folau ma tuu mumusu ina ia avea ma tagata matua i le ola alofa feesotai ma le Atua aemaise tuaoi.

Tatou Faatoese i le Atua:--

1. Ona o le ola finauvale i musumusuga a le Agaga ina tuuese le ola faamaualuga ma le ola faailoga tagata e lepetia ai le nofo fealofani.
2. Ona ua vaivai le iloa o le uiga loloto o le papatisoga ina ua papatisoina fanau e fai ma faamanatu i le alofa tunoa o le Atua o loo aapa mai pea e sii atu i tatou i le mafutaga ma ia.
3. Ona o lo tatou faatamala i upu tatou te faasoa ai i talanoaga, ma le faatamala e faia galuega lelei e iloa ai le ola tauivi i le taitaiga a le Agaga.

Tatou Tatalo i le Atua:--

1. Ina ia tatou maua le ola ua matua i le faatuatua e faatino ai galuega lelei e molimauina le alofa tunoa o le Atua.
2. Ina ia tatou finau e tausii le ola fealofani i le moni o le ola i le feavatai, fefaaloaloi i le loto gatasitasi i le Alii.
3. Ina ia tatou maua le iloa e faamoemoe ai i le galuega mana a le Agaga e faatino ai le ola finau e faatoilalo i fili

ma pa vaeloto o loo taumafai e talepe le nofo fealofani
ona o le eseese o lanu, gagana, aganuu ma talitonuga.

Aukuso 10, 2019

Tusi Faitau: Salamo 130: 1 - 16;

Matua: Salamo 130: 5 “Ou te faatali atu i le Alii, o loo
faatali atu lava lo’u agaga; ou te faamoemoe foi i
lana afioga.”

Manatu Autu: FAATALITALI MA FAAMOEMOE I LE ALII

Tatou Faafetai i le Atua:--

1. Ona o lona alofa i lo tatou ola maaleale ma le vaivai ae liliigi mai pea le manuia i lona tumu atoatoa o loo taoto ai lo tatou faamoemoe i le ola ua manuia i le faafouina.
2. Ona o lona agalelei ua tatou faamoemoe i ai e talia mai ma toina mai le ola ua faamagaloina o loo iai le manuia.
3. Ona o le Atua le papa o lo tatou olataga e galueina le ola vivii e faamanūina lona alofa silisili ese ua tatou maua ai le ola ua faamamaina.

Tatou Faatoese i le Atua:--

1. Ona o le faanoanoa ona lo tatou ola faatamala ma mea sese sa tatou faia ua manino i le silafaga paia a le Atua.
2. Ona o lo tatou le iloa ona faatalitali ma faamoemoe i le faasinoga a le Alii mo lo tatou ola finau ua mafua ai ona tatou tau mamao ma le alofa faamagalalo.
3. Ona o lo tatou vaivai ua mafua ai ona tatou tumau i le ola vaogatā i musumusuga a lou Agaga.

Tatou Tatalo i le Atua:--

1. Ina ia tatou maua le manino e faamalamalamaina o tatou olaga taumafai e tutumau i le faatalitali i le Atua i mea e tatau ona tatou savavali ma ola ai.
2. Ina ia tatou tumau i le faamoemoe i le faaali mai o le Atua i ala eseese ua finagalo i ai tatou te maua ai le manuia ma le filemu.
3. Ina ia tatou maua le poto mai le Atua o loo i ai le faamaoni ma le onosai i le ola tatalo ma le ola tapuai e tatou te iloa ai le latalata mai o lona alofa tunoa.

Aukuso 17, 2019

Tusi Faitau: Efeso 5: 15 - 20;

Matua: Efeso 5: 16 “ia faaaogaina e outou aso o lenei olaga, auā o ona po nei ua leaga.”

Manatu Autu: IA MAUA LE POTO E FAITAU AI LE TAU A O TAIMI MA ASO O LE OLAGA.

Tatou Faafetai i le Atua:--

1. Ona o lana tausiga alofa le mavae i taimi o lo tatou vaivai ma taimi tatou te faatamala ai le taua o taimi ma aso o le olaga.
2. Ona o lona alofa e ta'ita'i ina ia i tatou i le ola faamaoni e faaaoga tatau o tatou aso e fai ai galuega lelei ua finagalo i ai lo tatou matai.
3. Ona o lona Agaga e faatonu folau e mafai ai ona tatou iloa tulaga faigata o loo feagai pea ma i tatou i nei vaitau o le olaga.

Tatou Faatoese i le Atua:--

1. Ona o lo tatou ola faatamala i le faaaogaina tatau o tatou taimi e galulue ai a o maua le ola ma le malosī.
2. Ona o lo tatou ola le faaeteete e savavali ma le poto a ua tatou mulimuli i ala o le valea ma le pogisa e taunuu i taimi o loo i ai le faanoanoa.
3. Ona ua tatou mulimuli i faiga faatosiga a le fili ma ua tatou oo atu ai i le faanoanoa ona ua taumamao ma le mafutaga ma le Atua.

Tatou Tatalo i le Atua:--

1. Ina ia tatou maua le ola tutumau i ala tatau ma ala lelei o le faaaogaina o taimi ma aso o lo tatou ola e faatino ai galuega lelei e fai ma taulaga faafetai i le Atua.
2. Ina ia tatou iloa ona ola i le Agaga e mafai ona tatou aloese mai tuinanau o le tino e feteenai ma ola ua iai le faautauta ma le poto.
3. Ina ia tatou iloa le ola salamo ae naunau i le tatalo ma pepese i le mamalu o le Atua i lona alofa e faavavau i le ola ua iloa le taua o le taimi ma aso o le olaga.

Aukuso 24, 2019

Tusi Faitau: loane 6: 56 - 59;

Matua: loane 6: 58 “O lenei le areto ua alu ifo mai le lagi, e le pei o outou tamā na aai le manai, a ua oti i latou; o lē ai i lenei areto e ola ia e faavavau lava.”

Manatu Autu: ARETO O LE OLA

Tatou Faafetai i le Atua:--

1. Ona o le tautua a le Alo o le Atua, ua tatou maua ai le faaolataga e faamanatu mai pea e le Atua i le sauniga o le faamanatuga, ma le faatasi mai o Iesu i le ola e manino ai le faavavau o le mafutaga i le alofa o le Atua.
2. Ona o lona taulogologo mai pea ma lona naunau mai pea ina ia tatou talitonu i lona alofa ua saunia ai mea lelei mo i tatou ma iloa ai lona latalata mai.
3. Ona o le faatasi mai o Iesu ua tatou iloa ai ona tutumau i lona alofa, auā o ia o le areto o le ola mai le lagi.

Tatou Faatoese i le Atua:--

1. Ona o lo tatou le tutumau ia Iesu Keriso, a ua tatou tosina i mea papa'u o lenei olaga ua mafua ai ona tigaina i mafatiaga ma faafitauli o loo i ai le fanoanoa.
2. Ona o lo tatou manatu māmā i le mafutaga ma Iesu e ala i le faamanatuga, i le faatasi mai o Iesu i le areto ma le sua o le vine.
3. Ona o lo tatou vaivai i le tatalo i le mana o le Agaga e fesoasoani i lo tatou le malamalama i le loloto o afioga a le Atua o loo iloa ai upu o le ola faavavau i le areto mai le Atua.

Tatou Tatalo i le Atua:--

1. Ina ia tatou maua le iloa ma le talitonu e tutumau ai i le alofa laveai o le Atua e ala i lona Alo ua a'oa'o mai ai le ola e faavavau ma le mafutaga tumau i le alofa tunoa.
2. Ina ia tatou maua le loto faafetai tatou te o atu ai i luma o le Atua ma le talitonu, o tatou lava o tagata agasala ua faamamaina ma faamagaloina i le alofa tunoa ona o Iesu Keriso.
3. Ina ia tatou tutumau i le ola talitonu ia Iesu ua tatou iloa ai upu i le ola ua tatou maua ai lona filemu ma le manuia e leoleoina ai o tatou mafaufau.

Aukuso 31, 2019

Tusi Faitau: Mataio 5: 1 - 5;

Matua: Mataio 5: 3 “ Amuia ē matitiva i le agaga; auā e o latou le malo o le lagi.”

Manatu Autu: IA LOTO MAUALALO

Tatou Faafetai i le Atua:--

1. Ona o uiga o le lotomauualalo ua avea ai Keriso ma faataitaiga sili mo tagata.

2. Ona o faamanuiaga o le loto maualalo e o latou le malo o le Atua.
3. Ona o ana afioga ua a'oa'oina pea tatou ina ia tatou savavali ai auā e maua ai le filemu moni ma le ola faavavau.

Tatou Faatoese i le Atua:--

1. Ona e iai taimi e le maua ai le nofo filemu o ona tagata ona o le faamaualuga ma le fia pule.
2. Ona ua le fealofani la tatou faasoa atu o lona filemu i le lalolagi ma mea tatou te faia.
3. Ona ua feī o tatou taliga ua le maua ai le loto maualalo e ola ai.

Tatou Tatalo i le Atua:--

1. Ina ia foai mai le loto matala e iloa lelei ai ana afioga e maua ai le toa filemu i itu aso vevesi ma le le mautonu.
2. Ina ia liliuina le loto faamaualuga i le loto maualalo, ma le loto eleelea i le loto mamā e faatino ai le auaunaga.
3. Ina ia a'oa'oina tatou e alolofa atu i e o ita mai ma fai tatou ma fili, ia liliuina o tatou loto tiga i le loto salamo ma fiafia i le nofo lelei ma le filemu e pei ona faataitai mai e Iesu.

SETEMA

Setema 7, 2019

Tusi Faitau: Mataio 20: 26 - 28;

Matua: Mataio 20: 26 - 27 “ a e le faapea outou; a o sē fia sili ia te outou, ia fai o ia ma a outou auauna; o sē fia muamua foi ia te outou, ia fai o ia ma a outou tautua.”

Manatu Autu: O LE ALA I LE PULE O LE TAUTUA

Tatou Faafetai i le Atua:--

1. Ona o le auala e oo ai le auauna i le pule faale Atua.
2. Ona o le faaa'oa'oga o le apa fafano ma le ie soloi.
3. Ona o le tautua toto a le Atua, na maliu ai Iesu e faaolaina ai i tatou uma.

Tatou Faatoese i le Atua:--

1. Ona o le fia sili ma le faamaualuga.
2. Ona ua lape la tatou tautua ma saofafa'i i le mamalu o le Atua, a ua leai se ola auauna.
3. Ona o lo tatou le malamalama i le amoina o le satauro.

Tatou Tatalo i le Atua:--

1. Ina ia avea i tatou ma tautua i le pule a le Atua.
2. Ina ia auauna atu i le Atua ma le loto atoa, malosi atoa, ma le agaga atoa.
3. Ina ia avea i tatou ma faiava poo nofotane mo le Alii.

Setema 14, 2019

Tusi Faitau: Eperu 6: 17 - 20;

Matua: Eperu 6: 19 "Ua ia i tatou lena faamoemoega pei se taula o le agaga, e le matosina ma ua mausali, e oo foi i totonu i tala atu o le ie puipui"

Manatu Autu: FAAMOEMOE

Tatou Faafetai i le Atua:--

1. Ona o Iesu Keriso o le taulaga o le faamoemoe o Kerisiano uma.
2. Ona o le ofo a le Atua e tasi ae afe mo le lalolagi atoa, ua le toe faia ai ni taulaga i toto o manu fasi.
3. Ona o le tamai mamoe a le Atua e leai sona ila po se pona, ua mamā ma magalo ai i tatou uma.

Tatou Faatoese i le Atua:--

1. Ona o lo tatou opeopea, fetosoaiina ma seetia i galu le fati o le olaga.
2. Ona o le le noamau o tatou faamoemoega i le taula o le agaga e le ma tosina ma ua mausali.
3. Ona o le loto le talitonu ma faatuatua i e na muamua atu i le alatanu o i o tatou luma.

Tatou Tatalo i le Atua:--

1. Ina ia faateleina lo tatou talitonu ma le faatuatau i le faamaoni o le Atua, i le faasolo mai o auga tupulaga ua mavae atu.
2. Ina ia faatupuina lo tatou fiafia e galulue punouai i le faamoemoega o loo ua uma ona saunia mo i tatou.
3. Ina ia tatou lagona le pa'i mai o le filemu o le Atua, ona Iesu ua avea ma fautua mo i tatou i le malo o le lagi.

Setema 21, 2019

Tusi Faitau: Kalatia 6: 7 - 10;

Matua: Kalatia 6: 9 "Aua nei tatou faapalapala i le amiolelei; auā o ona po e tatau ai tatou te selesele mai ai, pe afai tatou te le faavaivai."

Manatu Autu: TULAFONO O LE SELESELEGA

Tatou Faafetai i le Atua:--

1. Ona o le saunia e le Atua o le vanimonimo, lalolagi ma le sami mo le tagata, ma le malosi, potu ma le agaga e olaina ai le olaga.
2. Ona o le faasusuina o le eleele e ola ma tutupu ai o mea toto ma le Agaga Paia e faasino, faatonutonu ma fautuaina ai le tagata.
3. Ona o le seleselega ua tatou aea ai i le satauro na toto e le Alo o le Atua mo i tatou.

Tatou Faatoese i le Atua:--

1. Ona o lo tatou paie ma le faatalale i le tausia o le faatoaga a le Atua.
2. Ona ua na o na tatou faaoga o mea na toto e isi a ua leai sa tatou galuega e poliliina ai le faatoaga.
3. Ona ua leai se seleselega mo le Atua i lo tatou faatamala i o tatou tiute ma taleni na foaiina mai e ia.

Tatou Tatalo i le Atua:--

1. Ina ia faaosofia o tatou loto e galulue ma le faamaoni i le feau ma le galuega a le Atua, auā ni agaga se tele mo lona malo.
2. Ina ia tatou iloa ona faalagolago i le Agaga ma le ta'ita'iga e ola lausuusi ma fua mai ai laau o le faatoaga a le Atua.
3. Ina ia tatou toto, faasusu ma faamama, a e faalagolago i le mana o le Atua tatou te selesele ai ma le alaga fiafia.

Setema 28, 2019

Tusi Faitau: Faataoto 3: 5 - 12;

Matua: Faataoto 3: 5 “Ia e faatuatua i le Alii ma lou loto atoa; a e aua le faalagolago i lou lava atamai.”

Manatu Autu: FAALAGOLAGO I LE ATUA

Tatou Faafetai i le Atua:--

1. Ona o le faamaoni o le Atua mai le amataga seia oo mai le asō.
2. Ona o le Atua o auga tamā, Atua o Aikupito, Atua o Kanana, o le Atua o le tafeaga.
3. Ona o le Atua o le satauro, o le Atua o le alefa ma le ameka.

Tatou Faatoese i le Atua:--

1. Ona o le fetosoaina pea o lo tatou faatuatua ona o tatou manatu ma le faaletagata.

2. Ona o le le a'oa'oina o i tatou i vaega ma mea ofoofogia na faia talu mai lava le amataga seia oo mai i le asō.
3. Ona o le faia pea o o tatou loto, a e tuu le finagalo o le Atua.

Tatou Tatalo i le Atua:--

1. Ina ia faatuputeleina lo tatou talitonu ma le faalagolago i le Atua soifua.
2. Ina ia tatou talitonu i le Atua ma ana galuega mai le foafoaga seia oo mai i le faaolaina o tagata ma le lalolagi atoa.
3. Ina ia talitonu tagata uma i lona maliu ma le toe tu manumalo mai le oti ma le tuugamau.

OKETOPA

Oketopa 5, 2019

Tusi Faitau: Iakopo 2: 14 - 25;

Matua: Iakopo 2: 18 "A e fai mai se tasi, 'O ia te oe le faatuatua, o ia te au foi galuega'; ina faaali mai ia ia te au lou faatuatua e aunoa ma galuega; ou te faaali foi ia te oe lo'u faatuatua i a'u galuega. "

Manatu Autu: O LE FAATUATUA MA GALUEGA

Tatou Faafetai i le Atua:--

1. Ona o le Tusi Paia o loo a'oa'o, faatonu, ma faapotoina ai i tatou i le Atua ma lana faaolataga.
2. Ona o lona Agaga Paia e galueaina le upu ina ia fua mai ai ni galuega lelei.
3. Ona o le faatinoga ma le faataunuuina o le upu alofa i luga o le Satauro.

Tatou Faatoese i le Atua:--

1. Ona ua tele lo tatou iloa ma le poto i le upu, a e itiiti lona faatinoina.
2. Ona ua tatou paie e faitau ma tatalo i le Agaga Paia e faamatalaloto uiga loloto o le afioga a le Atua mo o tatou olaga.
3. Ona ua na ona tautala o tatou gutu, a e le savavali ai o tatou vae.

Tatou Tatalo i le Atua:--

1. Ina ia faatupuina lo tatou fiafia e faitau ma suesue i le Tusi Paia i aso uma.

2. Ina ia tatou lagona le fetalai mai o le Alii i o tatou loto ma agaga i le tatalo, ma manatunatuga i ana afioga paia.
3. Ina ia tatou tautala ma savavali i afioga paia a le Atua ma le faamaoni.

Oketopa 12, 2019 Lotu Tamaiti

Tusi Faitau: Failauga 3: 1 - 111;

Matua: Failauga 3: 1 “O le mea ma lona tausaga i mea uma, ma ona lava po i mea uma lava i lalo o le lagi;”

Manatu Autu: O TAIMI MA VAITAUSAGA

Tatou Faafetai i le Atua:--

1. Ona o le fesuiaiga o taimi ma vaitausaga.
2. Ona o le gasologa o le olaga e agai pea i luma i taimi uma.
3. Ona o le satauro, o le molī o le ava mo le faolauga a le au Kerisiano.

Tatou Faatoese i le Atua:--

1. Ona o lo tatou taumafai pea e taofi le taimi ia aua le suia.
2. Ona o lo tatou fao malo i taimi o isi, a ua tatou le iloa ona faatali i o tatou taimi.
3. Ona ua tatou le iloa ona faitau taimi ma vaitausaga tatau ua fuafuaina mai e le Atua, mo lea mea ma lea mea.

Tatou Tatalo i le Atua:--

1. Ina foai mai le faautautaga mamao ma le tofa loloto e iloa ai taimi tatau mo mea eseese o le olaga.
2. Ina ia iloa ma malamalama le taimi e savali ai ma le taimi e nofo ai i lalo.
3. Ina ia iloa le taimi e galue ai ma le taimi e malolo ai, le taimi e tautala ai ma le taimi e faalogo ai.

Oketopa 19, 2019

Tusi Faitau: Efeso 4: 7 - 13;

Matua: Efeso 4: 11 “O ana mea alofa foi, ia fai nisi ma aposetolo, o isi foi e fai ma perofeta, o isi foi e folafola le tala lelei, o isi foi e fai ma leoleo atoa ma a’oa’o;”

Manatu Autu: VALAAUINA E FAI FEAU A LE ATUA

Tatou Faafetai i le Atua:--

1. Ona o le valaauina o tatou tagata faatauvaa mo lana galuega, i taleni, faiva ma tiute eseese e tautua ai le malo

o le Atua i aso uma i le oloolo pitovaa o agavaa taitasi ua mafai ai ona faia le galuega ma le filigā.

2. Ona o le Ekalesia ma ona itu tino eseese ua galulue o le tino e tasi mo Keriso.
3. Ona o le galuega faaola a Iesu na faataunuuina i luga o le satauro mo i tatou uma.

Tatou Faatoese i le Atua:--

1. Ona o lo tatou le lagonaina o lo tatou valaaaina.
2. Ona o lo tatou manatu faatauavaa i le galueaina o le feau a le Atua, ma ua tatou feau a tatou galuega mo le Alii ona ua tatou fai ma le vaavaai i isi.
3. Ona ua le oo a tatou galuega i le ute o faigamea, o le viiga o le Atua a e le o le tagata.

Tatou Tatalo i le Atua:--

1. Ina ia a'oa'o mai le Agaga o le Atua i le ofoina atu atoa e auauna ma tautua mo lona malo.
2. Ina ia faaaogaina o tatou tagata faatauavaa e faia lona finagalo i taimi uma, a e le mo ni nai taimi.
3. Ina ia aumaia le mana e fesoasoani mo lo tatou vaivai ma le loto palaai i mea e manuia ai.

Oketopa 26, 2019

Tusi Faitau: Luka 3: 7 - 14;

Matua: Luka 3: 9 "O loo tuu nei foi le matau i le tafu'e o laau; o laau uma foi e le fua mai i fua lelei, e taia ma lafoina i le afi."

Manatu Autu: O LE VALAAU INA IA SALAMŌ

Tatou Faafetai i le Atua:--

1. Ona o le feau o lenei itula, ina ia sauni i tatou uma mo le tala lelei a Iesu Keriso.
2. Ona o le oo mai o le faaolataga mo tagata uma e talia o ia i le salamō ma le faatuatua faamaoni.
3. Ona o le logoina o le lalolagi, ina ia teuteu ma faamamaina o tatou loto mo le oo mai o le faaolataga.

Tatou Faatoese i le Atua:--

1. Ona o le fefoifoia'i o lo tatou salamō i lea aso ma lea aso.
2. Ona o le maaa o tatou loto i le taugologolo a le upu a le Agaga i aso uma.
3. Ona o le galogofie o le satauro ma le toto na mlaigi ai ona o tatou aleu ma sese i aso fai soo.

Tatou Tatalo i le Atua:--

1. Ina ia faatumuina o tatou loto i le olioli o le Atua e sauniuni ma tapena ia o tatou aiga ma lana ekalesia mo lona finagalo mo i tatou uma.
2. Ina ia muai salamōina i tatou o tamā ma tinā, o ta'ita'i o nuu ma ekalesia, ma papatisoina i le vai ma le Agaga.
3. Ina ia sausuina i tatou uma i le toto taua o Iesu Keriso, e faaaupagaina ai o tatou ola taumafai i aso uma o totoe i lenei olaga.

NOVEMA

Novema 3, 2019

Tusi Faitau: Roma 8: 31 - 39;

Matua: Roma 8: 31 "O lenei, se a sa tatou upu i nei mea? Afai ua au ma i tatou le Atua, o ai sē faasaga tau mai ia i tatou?"

Manatu Autu: O LE TOE UPU, E LEAI SE TASI.

Tatou Faafetai i le Atua:--

1. Ona ua tatou mafai ai mea uma lava i lona faatasi mai, ma ua tatou le fefefe ai i se mea e tasi.
2. Ona ua manino ma mautinoa o ia o le toe upu i soo se mea tatou te tauivi ai i lenei olaga.
3. Ona poo le a lava le malolosi o faaososoga, poo mea ua faia e le tagata ua tatou mautinoa a auai lo tatou Atua ma i tatou, e leai lava se isi mea e faasaga tau mai.

Tatou Faatoese i le Atua:--

1. Ona o le vaivai o lo tatou faatuatua i le tele o taimi, ua tatou masalomia ai lona faatasi mai ia i tatou i o tatou mafatiaga.
2. Ona o lo tatou le tumau i le toe upu o lo tatou faatuatua, o Iesu tatou te malolosi ai i mea uma tatou te finafinau ai.
3. Ona e tele ina tatou saili ala e mafai ona fesoasoani mai i lo tatou vaivai, a e ua galo ia i tatou o loo soifua lo tatou Atua, ua na o ia lava tatou te malolosi ai.

Tatou Tatalo i le Atua:--

1. Ina ia faatumauiina pea lona Agaga ia i tatou, ina ia tatou malolosi ai e teetee atu i le tele o faaososoga.
2. Ina ia faatuputeleina lo tatou malosi e feagai ai ma faigata o lenei olaga, le malosi tatou te maua ona o ia o loo auai pea ma i tatou i taimi uma.

3. Ina ia tumau ia i tatou le lagona o le le toe faalua fesasi i o tatou lagona ma manatu, a ia mauaa i o tatou loto, e leai lava se isi malosi i tala atu na i loo lo tatou Atua ua au ma i tatou.

Novema 10, 2019

Tusi Faitau: Efeso 4: 1 - 6;

Matua: Efeso 4: 4 "E tasi le tino, e tasi foi le Agaga, faapei ona valaauina o outou i le faamoemoe e tasi ua valaauina ai outou;"

Manatu Autu: E TASI I TATOU UMA I LE ATUA.

Tatou Faafetai i le Atua:--

1. Ona ua mafai ona taua tatou uma ua tasi i lona Alo o lesu Keriso, ua tutusa ai tagata uma lava.
2. Ona ua mafai ona taua tatou uma o lana fanau e ala ia lesu Keriso, ma ua tasi ai lo tatou faautautaga, tasi lo tatou Alii, tasi lo tatou Atua.
3. Ona ua a'oa'o mai pea ia i tatou ina ia tatou maua le loto e tasi, i le agamalu ma le alofa, i le faapalepale ma le faamoemoe e tasi; ua valaauina foi i tatou uma i le suafa e tasi o lesu Keriso lea.

Tatou Faatoese i le Atua:--

1. Ona e tele taimi tatou te le maua ai le loto tasi, ae faatu lava le la o le tagata lava ia ma fai a lona lava loto.
2. Ona ua tatou iloa ma malamalama i le Atua e toatasi, a e ua tatou fausia nisi lava atua tatou te faataua ma faamuamua.
3. Ona e vaivai i tatou i le ola agamalu ma loto maualalo, vaivai le ola faapalepale, vaivai ai ma lo tatou maua o le loto e tasi e auauna ai le Keriso e toatasi.

Tatou Tatalo i le Atua:--

1. Ina ia fesoasoani mai i lo tatou vaivai i le faatutusa o tagata uma, ina ia mafai ma faigofie ai ona tatou maua le loto e tasi.
2. Ina ia fesoasoani mai ia mafai ona tatou ola i le loto maualalo ma le agamalu, i le alofa ma soo se tasi.
3. Ina ia fesoasoani mai ina ia tatou manino i lo tatou valaauina, na valaauina i tatou i le Agaga e tasi, ina ia mafai ona tatou faatino i lo tatou tapua'i i le Atua e toatasi.

Novema 17, 2019

Tusi Faitau: Salamo 105: 1 - 5;

Matua: Salamo 105: 4 “Sailiili ia outou i le Alii ma lona malosi; sailiili i ona fofoga, aua e le aunoa.”

Manatu Autu: SAILI I LE ATUA MA LONA MALOSI

Tatou Faafetai i le Atua:--

1. Auā e leai lava se isi malosi e sili atu na i lona lava malosi.
2. Auā poo le a le tele o lo tatou vaivai, o loo soifua o ia e tatou te saili i ai mo le malosi faafouina.
3. Ona ua tatou mautinoa tatou te le mafaia se mea e tasi i lo tatou lava malosi, a o le malosi mai ia te ia tatou te mafaia ai soo se mea faigata.

Tatou Faatoese i le Atua:--

1. Ona o le tele o taimi ua tatou manatu ua tatou faia mea uma i lo tatou lava malosi.
2. Ona ua tatou saili le malosi i nisi o tulaga e le tusa ai ma lona finagalo, pei o fualaau faasaina ma ava malolosi.
3. Ona ua tele ina tatou faaoga lo tatou malosi i mea le sa’o ma le le amiotonu, ua tatou saili ai lava mo tatou, a e ua le amanaia nisi o loo vaivai.

Tatou Tatalo i le Atua:--

1. Ina ia fesoasoani mai ina ia tatou faaoga tatau le malsoi ua ia foai mai, e fesoasoani atu ai mo nisi tagata, ma tatou lava.
2. Ina ia tatou saili atu ia te ia, ia na o ia lava le malosi faafouina mo i tatou ma ia tatou iloa ai ona faafoi atu ia te ia le viiga.
3. Ina ia faatauaso o tatou mata i le saili malosi i ala leaga, e afaina ai lo tatou soifua maloloina.

Novema 24, 2019

Tusi Faitau: Isaia 45: 1 - 7;

Matua: Isaia 45: 2 “O a’u lava, ou te savali atu i ou luma, ma ou faalauleleiina mea mapuepue; ou te nutinini i puipui apa memea; ou te gauia foi faamau uamea.”

Manatu Autu: TATOU TUU TASI I ALA O LO TATOU ATUA SOIFUA.

Tatou Faafetai i le Atua:--

1. Ona o lona silafia mamao ma le manino, o mea e manuia ai le tagata.

2. Ona o ona ala, o ala o le manuia ma le filemu, ma e leai se mea e mafaia ona taofia lona finagalo mo le manuia o ona tagata.
3. Ona o ia o lo tatou Atua, e i ai i soo se mea le malosi, e muamua e mulimuli foi, ma e taiala ma teuteu ala mo le saogalemu o ona tagata.

Tatou Faatoese i le Atua:--

1. Ona o le tele o lo tatou ola masalosalo i lana taitaiina o tatou tagata ma o tatou ala i aso uma.
2. Ona o le tele o taimi a tatou sese i le ala, ona tuuaia lea o lo tatou Atua, ma tatou uia ai ala le tonu.
3. Ona e tiga lava le manino o ala ua uma ona saunia e lo tatou Atua i o tatou luma, ae fai lava o tatou loto ma tatou uia ala leaga.

Tatou Tatalo i le Atua:--

1. Ina ia taitaiina i tatou i ala tonu o le Alii, ina ia taunuu manuia ai la tatou folauga o lenei tausaga.
2. Ina ia faasino mai pea mo i tatou ona ala sa'o, ala tatou te manuia ai ma tatou maua ai le filemu ma ala tatou te sao ai i le manuia uma ona ia saunia mo i tatou.
3. Ina ia faaaogaina i tatou e fai ma faasino ala mo nisi tagata o loo i le pogisa ma ia tatou vaaia se ala malamalama i o tatou tagata ma ta'ita'i ai i latou i le malamalama o lo tatou Atua.

TESEMA

Tesema 1, 2019

Tusi Faitau: Mataio 3: 1 - 6;

Matua: Mataio 3: 2 “ua faapea atu, Ina salamo ia outou; auā ua latalata mai le malo o le lagi.”

Manatu Autu: O LOU SALAMŌ E LATALATA MAI AI LE MALO O LE LAGI

Tatou Faafetai i le Atua:--

1. Ona o lona alofa mutimutivale ma lona alofa tunoa, e tele pea, ua liligi faaua mai e le aunoa i le fanau a tagata ma le au faatuatua, o loo tau saili atu pea i le malo o le lagi.
2. Auā ua muai saili mai i le tagata agasala, o le mamoe ua se i le vao faigata o le lalolagi, ma ua faamanatu mai i le fanau a tagata, o loo i ai pea le avanoa e mafai ai ona toe liliu atu e maua le laveai ma le faaolataga i le alofa o le Atua.

3. Ona o le talaiga o le malo o le lagi, e faaleleia ai mea leaga ma mea piopio o le olaga o loo saoloto ai pea Satani mana au; ina ia sulufai atu i ai soo se tasi ua talia ma talitonu, ma salamō faamaoni mai le olaga agasala ae toe fuataina le ola tuai i le ola fou ia Iesu Keriso.

Tatou Faatoese i le Atua:--

1. Ona e ui lava o loo valaau mai auauna e pei o loane le papatiso ina ia natinati atu i le malo o le lagi i tatou uma o loo saisaitia i le agasala, ae ua tatou faataliga tuli ma ua le lagona le feau.
2. Ona o le toatele o le au Kerisiano ua faatuatunai le poloaiga a le Alii o Iesu Keriso, o le fai o nuu uma lava ma soo, ma papatiso atu i le suafa o le Atua le Tamā, le Alo ma le Agaga Paia.
3. Ona ua le atagia i a tatou upu ma amioga le tala lelei ia Iesu Keriso.

Tatou Tatalo i le Atua:--

1. Ina ia lagona le salmo moni o tatou tagata ma liliu atu e talia le faaolataga ua uma ona saunia e Iesu Keriso.
2. Ina ia agalelei mai pea le Atua ia Samoa ma ona tagata, ina ia latou lagona le agaga o le salamo moni e talia ai o le ola faapaupau mo le mafuaaga o le tele o mea leaga ua faaseseina ai le mulimuli atu i le Atua.
3. Ina ia maua le malosi ma le loto tele e fai ai ma mea faigaluega o le malo o le Atua e saili tagata faatuatua ma folafola le feai o Iesu Keriso e faaolaina ma sao atu ai i lea malo.

Tesema 8, 2019

Tusi Faitau: Isaia 9: 1 - 7;

Matua: Isaia 9: 2 “O le nuu sa savavali i le pouliuli, ua latou iloa le malamalama tele;”

Manatu Autu: O LE MALAMALAMA O LE ATUA.

Tatou Faafetai i le Atua:--

1. Ona o le mana o lona malamalama o lo o faamalosi ai tatou i le faia o lana galuega e ala i lana ekalesia.
2. Ona o lona faafouina o i tatou i lona poto, ua tatou savavali ai i le malamalama o ona ala.
3. Ona ua faaalua ia Iesu lona filemu, lona malamalama ua leva ona faatalitali i ai le au faatuatua i lana Afio.

Tatou Faatoese i le Atua:--

1. Ona ua tatou le faaaogaina le malamalama o lana Afio e faavae ai le faia o lana Ekalesia.
2. Ona ua tatou valelea i le faaali mai o lona malamalama e ala i le fanau mai o Iesu i le lalolagi.
3. Ona ua tatou le faatupuina le filemu i le faia o lana Ekalesia a e ua tele lo tatou faatupu vevesi.

Tatou Tatalo i le Atua:--

1. Ina ia tatou iloa o le Kerisimasi o le vaitau o le fiafia ina ua tatou maua le ola fou, ma le malamalama o lana Afio e ala ia Iesu.
2. Ina ia tatou iloa ona faamalo, faaeaea i lona silisili ese e tusa o ala na ia afio mai ai.
3. Ina ia tatou iloa ua talafeagai le taimi, le tagata, faapea le nuu na afio mai ai, ma ia tatou iloa o faiga uma lava a le Atua.

Tesema 15, 2019

Tusi Faitau: Faaaliga 21: 1 - 6;

Matua: Faaaliga 21: 5 "Ua fetalai mai foi lē tietie i le nofoāalii, 'Faauta, ou te faia ia fou mea uma lava.'"

Manatu Autu: O LE ATUA FAI MEA FOU.

Tatou Faafetai i le Atua:--

1. Ona o le maualuga o lona faamoemoe, ina ia faia pea ia fou mea uma.
2. Auā e tele lava ina tatou ola i le ola tuai, a e faia pea e le Atua mea fou e ala lona Alo pele o Iesu Keriso.
3. Ona o lona faia pea o mea fou e ala i le poto o le tagata, ma le fesoasoani mai o le Atua.

Tatou Faatoese i le Atua:--

1. Ona o lo tatou ola pea i mea tuai i le tele o taimi o lo tatou ola, aemaise lava o uiga le manuia, e le tusa ma lona finagalo.
2. Ona o lo tatou mumusu e ala i upu fou mai ana afioga ma le tatou mumusu e solisoli mulivae i tulaga aao o Iesu Keriso.
3. Ona o lo tatou paie e faamoemoe i le Atua, o ia na te faia ia fou lo tatou ola.

Tatou Tatalo i le Atua:--

1. Ina ia tatou iloa le faaali mai o le Atua i mea fou mo le manuia o lo tatou ola.
2. Ina ia tatou mautinoa o le fou o lo tatou ola, e faatuputeleina ai lo tatou faatuatua, ma le faamoemoe ma lo tatou alolofa i le Atua.
3. Ina ia tatou mautinoa lelei o tatou ola fou o i le Alii, tatou te manuia ai i le lalolagi nei, aemaise o le ola i tala atu o le oti e pei ona faaalii i le soifua o Iesu Keriso.

Tesema 22, 2019

Tusi Faitau: Mataio 1: 18 - 25;

Matua: Mataio 1: 21 “E fanau mai e ia le tama tane, e te faaioga foi ia te o Iesu; auā e faaola e ia lona nuu ai a latou agasala.”

Manatu Autu: O LE ATUA UA ASIASI MAI.

Tatou Faafetai i le Atua:--

1. Ona ua atoatoa lona alofa i lona afio mai i le lalolagi e ala i le tagata o Iesu.
2. Ona ua manino ai mea sa faanenefu, ua malamalama ai mea sa pogisa.
3. Ona ua moni le alofa o le Atua i lona saili mai pea i le tagata, ma le faamagaloina o a tatou agasala.

Tatou Faatoese i le Atua:--

1. Ona ua le atoatoa le ofoina atu o tatou ola e tali ai i lona alofa mai e ala i le pepe o le Kerisimasi.
2. Ona ua le mafai ona tatou salamo ina ua asiasi mai o ia i mea o loo tatou vaivai ai.
3. Ona ua tatou le nonofo sauniuni i le aso ma le taimi e afio mai ai le Alii.

Tatou Tatalo i le Atua:--

1. Ina ia ave lona asiasi mai ma ala e toe fuataina ai lo tatou ola mo le Atua.
2. Ina ia avea le afio mai o Iesu e suia ai mea le manuia o loo tatou fiafia i ai.
3. Ina ia avea le asiasi mai o le Atua, e fai ma ala e toe saili atu ai le tagata i le Atua, ma toe foi atu i lana Afio.

Tesema 29, 2019

Tusi Faitau: Amosa 7: 1 - 9;

Matua: Amosa 7: 3 “Ua salamo le Alii i lena mea, ua faapea mai le Alii, e le o’o.”

Manatu Autu: O LE PULE AOA O A LE ATUA

Tatou Faafetai i le Atua:--

1. Ona o lona alofa fua ma le mutimutivale ua aumaia ai le faamoemoe lelei i tala atu o faigata ma puapuaga.
2. Ona o lona finagalo alofa ma le pule aoao i lo tatou ola.
3. Ona o le faaolataga ua saunia e ala ia te ia lava, ina ia i ai so tatou avanoa i lona malo.

Tatou Faatoese i le Atua:--

1. Ona ua tatou le lagonaina le naunau mai o le Atua i o tatou tagata taitoatasi.
2. Ona o le le iloa ma le le malamalama o tatou loto i le alofa tunoa ma le faamaoni o le Atua.
3. Ona o lo tatou le lagonaina ma le le faatauaina o le ola faafetai i le Atua i aso uma.

Tatou Tatalo i le Atua:--

1. Ina ia tatou lagonaina le alofa faamaoni o le Atua ma lona saili mai i le tagata i aso ma taimi uma.
2. Ina ia iloa ma malamalama le tagata i le naua’i mai o le Atua e ala i lona siufofoga malie e aumaia le mafanafana ma le faamalosi i tagata.
3. Ina ia tumau i le ola tatalo ma le amiotonu e pei ona a’oa’o mai ai o ia.